

PAULO ME LETA EPESO ÄTRUNGA BINAME BIME BAU ME

1 ¹ Cane, Paulo, Yeesu Keriso me ätyepäneji biname gäne Acejiyame me singi miji pi. Cane yoogärenine Acejiyame me binamewale bime bau me Epeso cewe je, lui cina toraca ngenecu cama iyeta padare cabu Keriso Yeesu cabu inajininuge. ² Acejiyame mime Babe piiyepu Yageyame Yeesu Keriso, teeme miiji te lenajame weeme cabu piiyepu teepi poode ceerame weebibine.

Keriso Mime Seemo bine Miiji Jewenenemige

³ Mine eso yääcäranesi Acejiyame ne, lui gyene mime Yageyame Yeesu Keriso me Acejiyame piiyepu Babe. Ingle naace popi mine Keriso cama yepä gemi, tabe ituge mibibine miiji wawena mime seemo ireclota cabu iyeta maramara mule ca cabucewe ca lui cina totneninisi. ⁴ Keriso cama yepä äbita miji pi Acejiyame te agedna me niinäce gaabe ca uja itu ngene ca niglinuji mibibine teeme binamewale me äbitame, naace name pi egä mine teeme täápume mara me äbitame piiyepu teeme opo gaabe je conocäco lenajame. Ingle Acejiyame babo singi ge mime täápume, ⁵ peei name pi tabe ngene uja itu jotwananuji mibibine äjäcrame teeme bägrä täápume lenajame ingle Yeesu Keriso me kaakesea miji pi. Ai lui teeme singi ge, teebine ngenecu miiji me jenuuji. ⁶ Siige mine Acejiyame ne yaawepyeräjesi teeme babo owecu name pi, tabe lipu teeme ngenecurage Bägrä papa itu nicärininuji, daremu cäco. ⁷ Keriso me uudi te lipu itu tapiruji, mime niiya mule daremu ne ecatuji, siige Acejiyame te mime niiya mule niisibrecäjimuge. Lipu baborage gyene Acejiyame me owecu, ⁸ tabe lui ne ituge aboclomäja mime täápume.

Ingle Acejiyame babo umle gyene iyeta mule poto cidi me, ⁹ tabe jenuuji tabe ngena täápume ngene itu jotwanuji wawename. Tabe teeme ogä ngene atwana ne seboclomtuji cime täápume, tabe lui poto cidi me ngene uja jotwanuji toraca me wawename Keriso cabu

ca. ¹⁰Acejiyame me pui ogä ngene atwana, tabe lui ne toraca me cire jaawenepi toracarage padare cabu, apu gyene egä tabe lui gwidape bine ituge wawenetnäja cabucewe piiyepu gawecewe je, tabe pui bine iyeta cire jaawenemepi yepä me äbitame piiyepu Keriso teeme mope biname me lenajame.

¹¹Acejiyame lui te iyeta gwidape bine teeme ngene atwanena piiyepu singi ibi jaawenimuge, tabe te mibibine nijäcrininuwi teeme binamewale tääpume lenajame ingle Keriso cama yepä äbita name pi. Tabe ujarage ngene jotwanuwi apu wawename, ingle ai lui teeme singi ge. ¹²Peei name pi cine lui cina niinäce biname gemi ngene atwanena singi Keriso cabu me acraname, cine Acejiyame ne yaawepyeräjesi, egä tabe lipu miijirage gyene.

¹³Cuta weene piiyepu liba itecijinuwi toraca mene, peei Miiwi Mene lui te ireclota ne secanuwi weeme bau me, weene piba ätrunga ne ecitujiye Keriso bau me. Piba Acejiyame ecituwi Aceji Seemo ne weeme cabu me cewecu tääpume, egä weene teemi nemi, tabe lipu ituge jaji wawename. ¹⁴Ingle Aceji Seemo pisi nyene mime cabu, peei name pi mine umle gemi egä mine cirege päpäna, Acejiyame ngena ituge jaji teeme bägräwale bine ceerame. Ai te niwabininige, egä Acejiyame te iyeta mäpu cabu ca kälyä cirege wawena pui biname bine, lui cina teemi nemi. Mine teebine yaawepyeräjesi teeme miiji name pi!

Irecu Ätumuta Mene Acnema Biname bime tääpume

¹⁵Cane liba nätecijepi, egä weene Yageyame Yeesu ne jitrunge-niye, cuta piiyepu weene singi gemi iyeta Acejiyame me binamewale bime tääpume, ¹⁶cane lica ituge ätecita Acejiyame ne eso ceeraname weeme poto cidi me. Cäme irecu ätumuta ngalebora cane weeme poto cidi me jaajananemune, ¹⁷cane yäätinärune mime Yageyame Yeesu Keriso me Acejiyame, jamyacu apacyera cama Babe ne tabe weebibine eei Seemo ceerame, lui Seemo te weebibine umle biname me jiwenininuge piiyepu Acejiyame ne weeme bau me yaaboclomtuge, siige weene piba umle läbitininuwe tabe. ¹⁸Cane irecu lätumutanune, egä Acejiyame te weeme mopemuli apatname teeme apacyera ne päpäna tääpume, piba weene umle läbitininuwe, egä ngena cabu me tabe weebibine ituge ala asogleca weene weeme ngene atwanena singi bine acraname; piiyepu cuta lipu bucurage miijimiji mule poto cidi me tabe ituge teeme bägräwale bine jaji teepi teeme bau ca päpäname; ¹⁹piiyeu cuta lipu baborage gyene teeme kokre, lui te kaakesea äbitenige mine ätrunga biname bime cabu. Ai lui pui yepä baborage kokre gyene, ²⁰lui ca Acejiyame te Keriso ne itu erpinantuwi budre cabu ca, siige ecanuwi cabucewe me, ecituwi teeme camu poto cidi me. ²¹Tabe caburage gyene iyeta seemo bime bau ca, cabu je lui cina mopeyame gemi piiyepu kokreyame gemi. Teeme ngii baborage gyene iyeta ngii cabu ca ai gawecewe cabu je. Cuta ciige padare cabu teeme ngii te baborage cire saanajepi. ²²Acejiyame te iyeta gwidape bine teeme ernge gawe

me ituge acrana, piyepu tabe ätrunga biname bine Keriso itu yääcäremepi tabe teeme mope biname me lenajame. ²³Ätrunga biname lui Yeesu Keriso me tääpe gemi. Teepi te Keriso ne camlecamle me jewenenisi. Cuta tabe te iyeta gwidape bine iyeta poto ta camlecamle me jewenenemige.

Budre cabu ca Ireclota me

2 ¹Padare puga ge, weene liba seemo ireclota cabu budre ge ingle weeme niyaniya mule piyepu ätecija cäco mule name pi. ²Pui padare cabu weene icwetnimujiye ai gawecewe me niyaniya mule bine; weene jitecijujiye laasi nyene mopeyame niyaniya seemo bime tääpume, lui cina buuwemope cabu otneninini. Tabe eei seemo gyene, page lui te ewadenemige Acejiyame ne lui biname cina lica birige ätecija. ³Niinäce mine iyeta pepu ituge lenaja, ätecija cäco. Mine biname bime singisingi mule bine icwetnimujisi. Mine jewenimujisi mime tääpe cina piyepu ngene atwanena cina ngena tääpume singi. Peei name pi Acejiyame me claabe te pui padare cabu piba enajuji mime tääpume, eei biname bime tääpume lipu page enajenige, lui cina camu binamerage bime singisingi mule bine icwetnenemisi.

⁴Yepä Acejiyame epu baborage owecu ge piyepu singi ge mime tääpume, ⁵egä mibibine, lui cina mime niya mule cabu budre ge, tabe ireclota me niweninuji Keriso me cabu ca. Peei lui teeme owecu name pi egä Acejiyame te weebibine ituge äsecrera niya cabu ca. ⁶Ingle mine Keriso Yeesu cama yepä gemi, pui name pi Acejiyame te mibibine ituge ten cama budre cabu ca arpineräja naace tääpume mine ten cama iyeta gwidape bine waadename cabucewe je. ⁷Acejiyame ai ne naace tääpume ituge wawena iyeta biname cina iyeta padare cabu päpäname teeme babo mijirage ätityera ne, tabe lipu teeme singi ne seboclomtuji mime tääpume Keriso Yeesu cabu ca. ⁸Ingle Acejiyame babo singi gyene ätityerame, tabe weebibine niya cabu ca itu isecrärinuji ingle weeme ätrunga name pi. Ai lui wemiji wawenäjeji lica gyene, yepä Acejiyame me owecu gyene weeme tääpume. ⁹Ai lui weeme kaakesea daremu lica gyene, peei name pi nuuja te äblicäco teemämu awepyeräja. ¹⁰Acejiyame te niwenininuji page mine lipu gemi. Tabe itu niwenininuji mine Keriso Yeesu cama lenajame siige mijirage kaakesea wawename, tabe lui kaakesea ituge amacetnäja mime tääpume.

Keriso me Binamewale Ten cama Yepä Gemi

¹¹Weene Israela biname bime cabu ca ärngecäneji lica gemi, piyepu Israela biname, lui cina lainininusi tääpe iirputäneji biname ca,^a teepi

^a **2:11** tääpe iirputäneji biname: Israela biname bime mule apu egä imäbägrä te liba laplimluge, eit bimu ingwe gaabe ca teeme imäbägrä bime gwidape cabu ca matikäli tääpe jiiirputusi. Ai tääpe iirputa lui cewecu gyene, Acejiyame lui ecärimuji Israela biname bine, egä teepi teeme biname gemi.

weebibine iyinininusi tääpe iirputa cäco biname ca. Weene gone ngene jitrimalinuge, weene lipu biname ge niinäce. ¹²Weene cude padare ge Keriso bau ca, piyepu weene cude padare ge Israela biname bime bau ca, Acejiyame lui bine jejäcrimuji teeme biname me. Jajeji mene Acejiyame lui ecäremuji Israela biname bine, pui lui weeme tääpume lica ge. Weene Acejiyame umle cäco inajininuji, piyepu weene nuuja ngene atwana lica ge, egä weene lipulipu miiji ne päpäname. ¹³Pui padare cabu weene cude padare ge Acejiyame bau ca, yepä page weene lipu Keriso Yeesu cama yepä gemi, weebibine Acejiyame bau me ituge waadena, ingle baarge uli cabu Keriso me uudi te tapiruji Acejiyame ne iiwärejame weeme niya mule äciseja tääpume.

¹⁴⁻¹⁵Siige Keriso taberage te poode ne secituji mime tääpume, cine Israela biname piyepu weene nuuja biname, tabe lipu niwenininuji mine yepä me äbitame. Mine niinäce claabeclabe ninajininuji, ingle weene lica icwetnimujiye cime Israela biname bime cotre bine, lui cotre cina birige jaji biname cina ngena wawename. Pui Cotre lui atreji pana ge, mibibine maramara me niwenininuji. Yepä Keriso me budre te pui Cotre ne iyeblingtuji naace tääpume cine Israela biname piyepu weene nuuja biname mine yepä äbitame ten cama kirece ingle wawename. Ai mule ca tabe poode ne secituji mine neeneni maramara sigu biname bime tääpume. ¹⁶Tabe lipu budre äbituji baarge uli cabu, siige mime claabe mule bine peega epremalemuji. Tabe teeme budre ca niwenininuji yepä me, siige niwecnininuji Acejiyame bau me. ¹⁷Pipu pi Keriso täduji, poode mene secanuji iyeta biname bime tääpume: cine Israela biname tääpume, lui cina Acejiyame gome jage piyepu weene nuuja biname tääpume, lui cina niinäce cude padare ge teeme bau ca. ¹⁸Keriso me kaakesea miiji pi cine Israela biname, weene nuuja biname, mine iyeta ibibi gemi yepä Seemo me ätityera ca Babe bau me otnime.

¹⁹Siige page weene catecewe biname coo idne cewe biname lica gemi, yepä weene Acejiyame me binamewale cama yepä gemi, teeme ingle cabu inajininige. ²⁰Weene uli gemi Acejiyame me mete raranga tääpume. Caage lui Keriso me ätyepäneji biname piyepu sasa menameyame biname gemi. Cunäcäpu caage lui Keriso sine. ²¹Tabe te iyeta ai caage piyepu uli bine jitwetnecäjenemige naace tääpume mete me äbitame, Acejiyame tääpume lui mete te mara me äbitenige. ²²Weene liba Keriso cabu inajininuge, Aceji Seemo te cuta weebibine jitwetnecäjininuge potu biname cama mete ne awejengtame, Acejiyame te luma enajenige.

Keriso me Ätyepäneji Biname me Kaakesea

3 ¹Acejiyame te lipu Israela biname piyepu nuuja gawe biname bine yepä me ituge wawena, cane Paulo te pui name pi irecu ätumutenine weeme tääpume, lui Israela biname lica gemi. Cane krokeciye mete cabu

säne, ingle cane Keriso Yeesu me kaakesea ne jaawenune weeme miiji täápume. ²Weene ituge ätecija Acejiyame lipu miiji ge căme täápume, siige ai kaakesea năcăruijı cane te wawename weeme miiji täápume. ³Acejiyame te sebo-clomtuji teeme ogă ngene atwanena ne, siige cebine umle nawenuji. Cane ai leta cabu matikăli uja bii byoogărıne pui potocidi me. ⁴Weene liba pecnepeye, weene umle păbitıpeye, egă cane toraca umle găne Acejiyame me ogă ngene atwanena Keriso potocidi me. ⁵Niinăce padare cabu biname bine umle lica ituge wawena pui potocidi me, yepă page siige Aceji Seemo te umle itu jaawenemepi Keriso me ätyepăneji biname piıyepu Acejiyame me mename biname bine, lui cina teeme ireclota yaacranepesi Acejiyame me kaakesea wawename. ⁶Pui ogă ngene atwanena lui naace gyene, egă laati bemi Israela biname lica, teepi liba yaacatusi Miiji Mene ne Yeesu Keriso potocidi me, teepi piba yaawadımusi cine Israela biname cama yepă Acejiyame ngena ceera teeme băgrăwale bine. Teepi Israela biname cama yepă birige, siige gigri yaawadımusi Acejiyame ngena ituge jaji Keriso Yeesu cabu ca ceerame. ⁷Acejiyame te cebine nawenuji Miiji Mene acenename, siige teeme kokre ne secıtuji căme cabu kaakesea wawename piıyepu cebine umle ceerame ai kaakesea täápume. ⁸Cane puu matikolărage găne iyeta Acejiyame me binamewale bau ca, yepă tabe miiji mule nawenuji, năcăruijı ai kaakesea cane Miiji Mene Keriso me ngălu căco dogwe potocidi me jajanename biname bine, lui Israela biname lica gemi. ⁹Căme kaakesea gyene iyeta biname bine umle wawename, egă Acejiyame me ogă ngene atwana te toraca me lipu cırege äbita. Acejiyame lui iyeta gwıdape bine itu jewenımuji, tabe ai ne niinăce lui padare cabu imlıtuji. ¹⁰Tabe naace täápume imlıtuji, mope mename seemo cina piıyepu cabu je lui teeme pana kokreyame gemi, teepi ai padare cabu ätrunga ingle biname bime cabu ca umle äbitame, egă Acejiyame me umle lipu baborage gyene. ¹¹Acejiyame te ai ne jewenuji teeme ngene atwana ibi, teeme lui puga ge padare me niinăce gaabe me, tabe lui ne toraca me jewenuji mime Yageyame Yeesu Keriso cabu ca. ¹²Mine liba Keriso cama yepă gemi, piıyepu teebine jıtrungenisi, mine siige temiji pi ajiri wălu căco nacluge Acejiyame bau me. ¹³Peei name pi cane jıjenininine, weene ngenecu măpu gone, egă cane weeme täápume aga măpu cabu nanajınige. Căme ai măpu te weeme miiji täápume äbitenige.

Paulo Ireçu Ätumutenige Epeso Biname bime täápume

¹⁴Cane liba ngene jotwananenine Aceji Babe te lipulıpu biname bine awecna teeme bau me, cane kokorare ca äăpednutenine teeme opo gaabe je. ¹⁵Tabe lui toraca Babe gyene. Tabe lui iyeta ingle bime Acejiyame gyene lui cabucewe je coo piıyepu gawecewe cabu je. ¹⁶Cane ireçu ätumutenine Acejiyame bau me, egă teeme bucurage miijimiji mule cabu

ca Aceji Seemo te weebibine kokre ceerame naace täápume weene piba ngenecu kokre cama lenajame. ¹⁷Piiyepu cane irecu ätumutenine, egä weeme ätrunga ca Keriso te lenajame weeme cabu. Piiyepu cuta cane irecu ätumutenine, egä weene iyeta gwidape naace popi wawename, ingle weeme singi pisi nyene Acejiyame piiyepu biname bime täápume. ¹⁸Piba weene Acejiyame me binamewale cama ibibi birige cängena umle äbitame, Yeesu me singi luma ngälu leca gyene, luma ngälu daamle gyene, luma ngälu caburage gyene, lipu uugle gyene; ¹⁹cuta weene teeme peei singi cabu lenajame, ngänu gyene weeme ngene atwana tuube gemi iyeta teeme peei singi ne oomlaname, siige weene piba cängena Acejiyame pana läbitininuye iyeta weeme ireclota cabu.

²⁰Acejiyame me kokre lui te mime cabu kaakesea jaawenuge, tabe pui kokre ca miiji gyene baborage wawena, mine lui täápume yäätinärusi coo ngene jwaatwananinusi ätinerame. ²¹Mine lui cina ätrunga ingle biname gemi piiyepu Keriso Yeesu cama yepä gemi, mine teebine yaawepyeräjesi, yepä padare me biname cina cuta nuuja padare me biname cina, iyeteta. Ai mene toraca gyene.

Ätrunga Biname Miiji Yepä

4 ¹Cane lui te krokeciye mete cabu nanajinige, ingle cane Yageyame me kaakesea jaawenune, cane jijenininine weene epu lenajame, Acejiyame lipu ituge jaji, tabe liba weebibine ala tisoglicinuji. ²Mope modamoda me gone läbitininuye, miiji owelaamelame piiyepu cängena lenaja. Worämu te gone iglinuge weeme poto biname bime mule name pi, yepä weene miiji weemämu singi äbitanipeye. ³Acejiyame me Seemo te icärininuge poode. Peei poode te jiwenininuge yepä äbitame, siige weene kokre äbitipeye yepä lenajame. ⁴Tääpe yepä gyene, Seemo yepä gyene epu pana, yepä taatu gwidape lipu pisi nyene Acejiyame lui cabu ituge ala asogleca weene ngene atwana singi acraname. ⁵Yepä taatu Yageyame gyene, yepä taatu ätrunga gyene, yepä taatu biname gyene lui me ngii cabu biname bine niiye ca jääcisäjemusi. ⁶Yepä taatu Acejiyame gyene, lui sine iyeta biname bime Babe. Tabe iyeta biname bine yaawadimuge, teeme cabu kaakesea jaawenuge piiyepu teeme cabu yaanajuge.

⁷Keriso mine yepäyepä bine kokre itu nicäranipi maramara kaakesea wawenetnäjame. Mine teeme baborage kokre cabu ca maramara pargi bine ituge waadenena. ⁸Oogäräneji mene te ai poto cidi me jicenige egä, “Tabe äduji caburage me, teeme cubuyame bine ätäyäneji ewadimuji ten cama. Tabe biname bine owecu gwidape ecäranemuji.”

⁹Ai mene egä “Tabe caburage me äduji” jewabenige, egä tabe niinäce ituge gawe cabu me äina. ¹⁰Siige lui te täinuji gawe me, tabe peese nyene, lui te äduji cabu me, iyeta caburage puupu bime cabu me naace

tääpume tabe piba iyeta poto ta lenajame iyeta gwidape cabu. ¹¹ Peei lui tabe sine, lui te “biname bine owecu gwidape ecāranemuji.” Pui owecu gwidape lui naace myene, egā tabe kokre ecāranemuji teepi maramara kaakesea wawenecame. Tabe poto bine jewenimuji teeme ätyepāneji biname me, poto bine jewenimuji Acejiyame me tagepogogo mene iicemame, poto bine Miiji Mene acenename iyeta poto ta, poto bine ätrunga inge mope biname me lenajame piyepu teebibine abiberājame. ¹² Tabe ai ne naace name pi jewenuji Acejiyame me binamewale bine amacetnājame teepi kaakesea wawename naace tääpume ätrunga biname, lui Keriso me tääpe gemi, teebibine kokre wawename. ¹³ Ciige mine iyeta piba yepā me läbitininago yepā ätrunga cabu ca piyepu eei cabu ca, egā mine umle gemi Acejiyame me Bägrä. Mine modamoda biname bime ngene atwanena cama ninajininuge, epu pana Yeesu lipu enajuji. ¹⁴ Ingwe ca piba mine bägrä bime pana lica gemi, lui bine angletneja biname bime maramara abiberāja cina yaawedanemusi buuwe pana coo malu pana. Pui angletneja biname cina lui teeme walya mene ca poto bine yaangletnājemusi conocono gaabe cabu otnime. ¹⁵ Mine pätā miiji biname bine jajanena ngena gyene toraca piyepu mine miiji mimemime singi lenaja, piba mine läbitininago iyeta mule cabu Keriso cama yepā äbitame, lui sine ätrunga biname bime mopeyame. ¹⁶ Tabe liba mope yaanajuge, tääpe me maramara piicwa teemerage puupu cabu lacranuge, piyepu piicwa maramara cina yepā mage ne jaawenusi, umeli cina liba teebibine yaatengecājimusi. Siige iyeta maramara piicwa liba teeme kaakesea jaawenusi, teepi lipu miiji birige wawena, piba tääpe te cāngenarage luutuge, kokre me läbituge, piicwa bime singi te liba teemeteme babo läbituge.

Yeesu cabu Lui Kirece Ireclota Gyene

¹⁷ Mime Yageyame me ngii cabu cane jijenininine weebibine umle wawename, egā ingwe ca gone cāāri lenaja Acejiyame umle cāco biname pana, lui cina papa gwidape poto cidi me ngene jwaatwananinusi, ¹⁸ piyepu lui bime mopemuli cabu krokeciye birige. Teepi cude padare gemi ireclota cabu ca, Acejiyame te lui ireclota ceera, inge teepi umle cāco piyepu ätecija cāco gemi. ¹⁹ Nuuja gwidape te äblicāco teebibine ajiri me wawena. Teepi nuuja gwidape wawena tääpume singi lica yepā sice buduma äbitename piyepu sargi ero mule wawenecame. Teepi ätecita cāco iyeta jugijugi mule bine jaawenimusi. ²⁰ Yepā weene Keriso bau ca pepu mule lica itu labiberājipeye. ²¹ Egāsu weene itu itecijipi teeme poto cidi me, piyepu inge weene teeme ingwe äcwi biname gemi, peei name pi weebibine ituge abiberāja toraca mene poto cidi me, Yeesu cabu lui pisi nyene. ²² Peei name pi weene miiji weeme sasa ngene atwanena bine abmaläcemame, lui cina jiwenujisi epu lenajame, weene

lipu niinäce ituge. Pui sasa ngene atwanena bine teemerage angletneja singisingi cina sabe jaawenimusi. ²³Weene pätä miiji kirece singi piyepu kirece ngene atwana cama lenaja. ²⁴Weene miiji kirece muleyame biname me äbitame, Acejiyame lui bine ituge wawena teeme pana me naace täápume weene toraca conocäco lenajame piyepu Acejiyame täápume mara me äbitame.

²⁵Peei name pi ingwe ca walya mene gone otrometnäja, yepä toraca mene ajanipeye weemämu, ingle naace popi mine iyeta piicwa gemi Keriso me tääpe cabu. ²⁶Weene liba claabe läbitininuye, peei claabe te gone iwadininuge niya mule wawename. Weene niinäce claabe cabu ca etecrutepeye, ingwe ca bimu te piba läpulepi. ²⁷Gone Satani ne padare yäcärüye tabe weebibine angletnejame niya mule wawename. ²⁸Laati te läbituge gwidape ero me, tabe miiji peei mule ne abmala, gije abacita kaakesea wawename teeme lenaja täápume piyepu owecumete biname bine ätityerame. ²⁹Gone niya mene iicana, yepä epu mene jicemuye, lui te miiji gyene biname bine ätityerame teeme ngena singi pisi nyene, siige piba weeme mene te ngenecu miiji me jaawenimuge laatibi yäatecijemuge. ³⁰Piyepu gone Aceji Seemo ne ngenecu mäpu me jaawenuye, ingle tabe lui cewecu gyene, egä weene Acejiyame memi. Tabe klaje jiwenininuge weebibine naace täápume Acejiyame te weebibine kälyä wawename iyeta mäpu cabu ca, peei bimu te liba cire tädepi. ³¹Gone niyaniya ngene jwaatwananinuye poto biname bime poto cidi me. Gone claabe te weebibine ätucera, ämugetna gone. Drämä gone piyepu niya mene gone biname bine jaji, coo poto claabeclabe mule gone. ³²Weene pätä miiji weemeweme owelaamelame lenaja piyepu owecu cama. Piyepu weene miiji weemeweme niya mule ngene ätrimela, Acejiyame te lipu weeme niya mule bine itu yääyebhengemepi Keriso name pi.

Apaclyera cabu Miiji Lenaja

5 ¹Ingle weene Acejiyame me ngenecurage bägrä gemi, weene miiji äbitipeye teeme pana lenajame. ²Weene weemämu singi äbitanipeye, epu pana Keriso lipu singi mime täápume, siige teeme ireclota ne iyemaluji mime täápume. Teeme ireclota epu pana ge owecu gwidape Acejiyame ne ceerame coo piyepu miijirage gwidape lui ca yiwäräjusi Acejiyame ne teebine ngenecu miiji me wawename. ³Weene gone nuuja biname täápume singi äbita liba mäáme coga coo rooriye lica teta cama sargi mule wawename; cuta iyeta jugijugi mule wawena gone. Piyepu weene gone singi ädri nuuja gwidape coo mule poto cidi me. Ai mule bine gone waweneca, cuta apu mule poto cidi me gone iicema, ingle weene Acejiyame me binamewale gemi. ⁴Gone iicetneja ajiri mule poto cidi me, niyarage ceepe gone coo nuuja budubuduma mene gone

iicetneja, yepä weene pätä miiji Acejiyame ne awepyeräja. ⁵Weene miiji umle äbita, egä lui te sargi mule jaawenuge coo lui te nuuja jugijugi mule jaawenuge, tabe lica läbituge biname me Keriso piyepu Acejiyame lui ne yaacanäsi. Singi ädri biname te cuta äblicäco pepu biname me äbita, ingle tabe lui täöpume singi yäädruge, pui te yaacatuge Acejiyame me puupu ne teeme ireclota ngalebora.

⁶Gone ire taatu jaacituye nuuja biname te weebibine budubuduma mene ca angletnejame, ingle apurage mule name pi Acejiyame te pagege claabe me äbita, lui cina teebine lica jäätecijusi. ⁷Peei name pi pipu biname cama gone abasuta. ⁸Niinäce weene krokeciye cabu jage, yepä page weene siige apaclyera cabu temi, ingle weene mime Yageyame memi. Weene miiji epu lenaja, apaclyera cabu biname cina lipu yaacrajuge, ⁹ingle apaclyera luma, puma miijimiji mule, conocäco mule piyepu toraca mule piti nemi. ¹⁰Weene miiji äbitipeye abiberäjame, egä ngena te Yageyame ne ngenecu miiji me jaawenuge. ¹¹Weene gone krokeciye mule cabu abasutana, lui cabu ca nuuja miiji ne lica päpäna, weene pätä apaclyera cabu me pepu mule bine isemepeye. ¹²Teepi lui mule bine jaawenimusi krokeciye cabu, babo ajiri cama mule gemi, lica wawena taatu cuta iicema piyepu ajiri cama gyene. ¹³Yepä iyeta mule bine liba apaclyera cabu me yaawadimusi, siige apaclyera te jaawabudne-muge, lipu mule gemi; piyepu apaclyera te liba krokeciye ne yaapaclyäruge, siige apaclyera me läbituge. ¹⁴Peei name pi apu ituge iicana egä,

“Arpinanti ute cabu ca,
alotnanti budre cabu ca,
piba Keriso te meebine naapaclyäruge.”

¹⁵Pipu pi weene miiji ire, egä weene lipulipu inajininuge. Weene miiji cängena lenaja lica budubuduma. ¹⁶Weene liba padare ne jääpänuye miiji mule wawename, weene jewenepeye, ingle ai bimu cina niyarage gemi. ¹⁷Peei name pi weene buduma gone lenaja, yepä umle äbitipeye, Acejiyame me singi ngena gyene.

¹⁸Weene sice buduma gone läbitininuye, ingle weeme ireclota ne sabe jaawenuge, Aceji Seemo te pätä miiji weeme cabu babo äbitame. ¹⁹Weene weemeweme etangemepeye salamo uupera bine, poto irecu ätumuta uupera bine piyepu Aceji Seemo te ngena uupera icärininuge. Weene weeme iyeta ngenecu cama uupera bine piyepu salamo bine etangemepeye Yageyame täöpume teebine awepyeräjame. ²⁰Weene miiji eso ceeraname Aceji Babe ne iyeta padare cabu iyeta gwidape poto cidi me mime Yageyame Yeesu Keriso me ngii cabu.

Mene Coga Rooriye bime täöpume

²¹Weene miiji weemeweme ätecijana, ingle Keriso lui weeme Yageyame gyene. ²²Coga cina miiji rooriye bine ätecija, teepi lipu Yageyame ne

jäätecijusi, ²³ingle rooriye sine mope biname coga täápume epu pana, Keriso lipu mope biname ge ätrunga ingle biname bime täápume. Tabe peese nyene, lui te niiya cabu ca ituge äsecrera ätrunga ingle biname bine, lui gemi teeme tääpe. ²⁴Peei name pi ätrunga ingle biname cina lipu Keriso ne jäätecijusi, coga te miiji teeme rooriye ne iyeta mule cabu pepu ätecija.

²⁵Piiyepu rooriye cina miiji teeme coga bime täápume singi epu pana, Keriso lipu singi ätrunga ingle biname bime täápume, siige teeme ireclota ne iyemaluji teeme täápume. ²⁶Taba ai ne naace täápume jewenuji teebibine mara me wawename Acejiyame täápume Miiji Mene abiberäja ca, niye ca liba teebibine niinäce jugi cäco ituge äciseja. ²⁷Taba singi ge ätrunga ingle biname cina teeme täápume lenaja teeme Keriso me miijirage jamyacu cama, jugi cäco, epucäco. Teeme cabu nuuja pläpu coo acalomla lica gyene, coo nuuja pepuyame.

²⁸Yoo, rooriye cina miiji singi teeme coga bime täápume, teepi lipu singi teemeraige tääpe täápume. Rooriye te liba singi teeme coga täápume, pui lui taba cuta singi birige teeme täápume, ingle teepi yepä gegi. ²⁹Nata nuuja te lica teeme tääpe ne ägyi, yepä cängenarage deedei yäacaranuge, ire jaatwuge, Keriso lipu ätru-nga ingle biname bine cängena ire jaatwemuge. ³⁰Mine umle gemi ai potoci me, ingle mine teeme tääpe me piicwa gemi. ³¹Oogäräneji mene te jiicenige egä, “Yoo, rooriye te miiji teeme mage babe bine abmala coga cama atejäclmutame, siige teepi yepä me läbitäsi.” ³²Ai mene te baborage gwidape ne eboclomtenige. Cane ngene ca begline, egä ai mene lui Keriso piiyepu ätrunga ingle biname bime potoci me. ³³Yepä ai mene cuta weeme tääpu myene. Rooriye cina, weene miiji singi weeme coga bime täápume, weene lipu singi weeme täápume. Coga cina, weene cuta miiji weeme rooriye bine ätecija.

Mene Bägrä piiyepu Mage Babe bime täápume

6 ¹Bägrä, weene miiji weeme mage babe bine ätecija, ingle ai lui conocäco mule gyene. ²“Weene miiji mage babe bine opo gaabe me acrana.” Ai lui niinäcerage cotre gyene ten cotre cabu ca, Acejiyame te lui cama mene ecituji egä, ³“Piba iyeta gwidape cina miijirage yaaclege weene cama, piiyepu weene lecaleca ireclota ne jääpänuye ai gawecewe cabu.”

⁴Mage babe, weene gone bägrä bine epu mule ca ire atwi, lui te teebibine claabe me jaawenimuge. Yepä weene teebibine yaabiberäjimuye teepi cängena lenajame piiyepu yaablawäjemuye Yageyame me singi ibi.

Mene Aletnäneji Biname piiyepu Teeme Modamoda Biname bime täápume

⁵Aletnäneji biname, weene miiji weeme modamoda biname bine toraca ngenecu cama, wälu cama ätecija. Weene peei ne yepä ngene atwana

cama jeweneye, epu pana Keriso ne lipu jättecijuye yepä ngene atwana cama. ⁶Weene teeme irewale taatu cabu gone apu äbitena naace name pi teepi piba ngenecu miiji cama lenajame weeme täápume. Yepä weene miiji iyeta weeme ngenecu ca wawena, Acejiyame ngena täápume singi, ingle weene Keriso me aletnäneji biname gemi. ⁷Weene gege cama weeme kaakesea jaawenuye, epu pana egä weene biname bime täápume taatu lica jaawenuye, yepä weene cuta Yageyame täápume jaawenuye. ⁸Gone ngene ätrimela, egä biname bime miijirage kaakesea name pi Yageyame te daremu yäcäranemuge, ngänu gyene teepi aletnäneji biname coo nuuja biname.

⁹Modamoda biname, weene cuta pepu miiji weeme aletnäneji biname bine cängena ire atwime. Weene cerämu opo cabu gone yäärmäjimuye. Weene gone ngene ätrimela, egä weene piyepu weeme kaakesea bägrä weeme yepä Yageyame gyene cabucewe je, lui te iyeta biname bine yepä ibi cire jitrani.

Ngena Gwidape ca Cubu Icaname Niiyaniya Cable cama

¹⁰Yoo siige, weene kokre äbitipeye Yageyame miji ba-borage kokre ca piyepu ten cama lenaja name pi! ¹¹Cubu gwidape iyeta asi-gräripeye Acejiyame te lui icärininuge, piba weene lica itrametninuge Satani me angletneja cabu. ¹²Mine bi-namerage cama cubu lica jicenis, yepä mine cubu jii-cenis niiyaniya cable cama, lui cina mopeyame gemi, piyepu lui cina kokreyame gemi, cuta lui cina ai gawe-cewe ne ecanenisi ai krokeciye padare cabu piyepu cuta buuwemope cabu lui cina otneninisi. ¹³Peei name pi cubu gwidape asigräripeye, Acejiyame lui icärininuge. Niiya padare te liba täduge, weene piba ibibi birige weeme cubuyame bine daremu wawename, piyepu cubu liba siige, weene piba camu ämyemuteji inajininuge.

¹⁴Weene miiji iyeta padare cabu amacetnäjäneji lenajame. Acejiyame poto cidi me lui toraca mene, weene peei ne ecatepeye baagi täápume weeme ibi cabu asigrame. Conocäco mule ne ecateye weeme moobe täápume dare älyengame. ¹⁵Cuta weeme singi Miiji Mene jajanename poode poto cidi me lui weeme ernge gwidape gemi. ¹⁶Weene iyeta padare cabu ätrunga ne ecateye, ime cabu lipu älyenga gwidape ne yaacenanute, siige weene peei ca yäätumimuye Satani me muye cama biigu bine. ¹⁷Acejiyame lipu weebibine niiya cabu ca ituge äsecrera, pui lui mope älyenga gwidape gyene weeme täápume. Acejiyame me Mene ecatepeye, Aceji Seemo lui Mene icärininuge. Peei lui weeme cubuturikä gyene. ¹⁸Weene iyeta ai mule bine irecu ätumuta cama jaawenimuye, Acejiyame ne yaawejanuye tabe weebibine ätityerame. Iyeta padare cabu irecu lätumutanininuye, Aceji Seemo te lipu opo jiwenaninuge. Peei name pi weene gone lätecitinuye, ngänu gyene ngena te läbituge, yepä irecu

lätumutanininuye iyeta padare cabu Acejiyame me iyeta binamewale bime täápume. ¹⁹Cäme täápume cuta irecu ätumutanipeye, egä mene iicana padare cabu Acejiyame te ngene atwana ceerame cane piba wälu cäco biname bine umle wawename teepi lui poto cidi me niinäce umle lica ge, egä Miiji Mene cabu pisi nyene. ²⁰Ai Miiji Mene ne acanename Keriso te cebine nätyepuji, siige cane page age säne krokeciye mete cabu. Weene irecu ätumutanipeye, egä cane wälu cäco jajanename Miiji Mene, cane lipu miiji jajanena.

Paulo me Yewo Mene Epeso Biname bime täápume

²¹Tukikus, mime miihirage ätrunga biname gyene, mime Yageyame me kaakesea lui te toraca jewenenige, tabe pa lädepi peeyeme weeme bau me. Weene teeme cabu ca pitecijipi iyeta, egä cane ama lipu nanajinige piiyepu ngena jewenenine. ²²Yoo, cane teebine naace täápume jityepenine weene teeme bau ca äteciyame, egä cine iyeta lipu gemi ama piiyepu cuta tabe weebibine kokre ceerame.

²³Acejiyame mime Babe piiyepu Yageyame Yeesu Keriso teepi iyeta ätrunga biname bine poode piiyepu singi ceerame ätrunga cama.

²⁴Acejiyame me miiji te lenajame iyeta eei biname bime cabu je, lui cina singi mime Yageyame Yeesu Keriso täápume apira cäco singi cama.

Cane ngii Paulo. Siige cäme mene ngälu peese.